

SINBAD O SINBAD, E BIAHA AKI SI TA DI MAS!

Aunke cuanto el a bisa cu voz bunita cu otro aña e ta bolbe, sigur ta cu **SINBAD** no ta bolbe mas, mirando e abusonnan grandi cu a ser cometi e aña aki.

E abusonnan aki ta pasobra Aruba a baha cabez atrobe pa esnan di afo cu por haci y deshaci manera nan kier y **NO TIN NINGUN HENDE** pa para nan pasobra di tur banda **NAN TIN BENDICION**.

E gran **SINBAD** a bin Aruba. Tur hende a bira loco, un presunto **Dios** a pone pia ariba nos isla cu **su angelnan**.

Pero e cantidad di telefon celular cu nan a keiro cune, ta kende ta paga nan?

Sigur cu no ta celularnan cu nan a haya como parti di nan asina yama "**promocion**"?

Ay..mi a lubida cu ta ser bisa awe cu "**ta nan propio celularnan**".

E cantidad di autonnan V-wagen cu nan a core cune y cu nan a haya como parti di nan promocion, ta kendenan ta paga pa esakinan?

Ay.. mi a lubida cu ta e compania a duna nan como "**promocion**".

E coremento di un lugar pa otro pa loco cu "**zwaailicht**" pa hala otro vehiculonan for di caminda, ta kende a duna nan permiso pa esaki?

E uso di un batayon "**paramilitar**" di asina yama "**bodyguardnan**", ta kende a duna nan permiso pa haci y deshaci manera nan kier?

Y pa colmo bisando tambe cu "**nan no tin cunez unda nan ta**".

Di unda e **bodybuildernan** aki a haya permiso pa pusha hende, saca hende di localidadnan, prohibi hende di dreña aki of aya y pone man riba hende?

Ay...., mi a lubida...Nan mag haci kico nan kier pasobra ta di **SINBAD** nan ta y Aruba mester di nan e tempo aki.

Ki mishi e **bodyguardnan** aki ta cana rond arma?

Ay...mi a lubida atrobe cu "**nan no tabata arma y mi no tin e prueba**" ni si cantidad di hende a mira nan cu arma, pasobra esey ta locual lo tende awe.

Kende a bisa cu tur cos a bay suave bunita den stadion?

Ningun hende no a menciona e inyeccionnan cu a ser haya?

Con esey ta posible, ta miedo tin di menciona esaki?

Colmo de los colmos ta cu **NOS POLIS** no tabata tin nada di bisa ni haci, pasobra **NI POLISNAN** nan no a respeta. Polis tin algo di bisa anto?

Ta di **SINBAD** nan ta. Hasta polis nan a prohibi di dreña cierto lugar. Imaginabo cu na stadion mes, **polis no a mag di dreña pasobra polis tin Arma** y na un club nocturno hasta nan a prohibi recherche di dreña.

Pakico nos tin opsporingsambtenaar anto?

Manera un agente policial a expresa: "**Pakico mi ta aki mi no sa pasobra mi no tin nada di haci ni bisa**."

Tur caminda cu nan yega cu nan tropanan ta ser exige cielo, mitar di bar, mitar di cushina y entrada tambe y e resto mester ta pornada pa nan hendenan.

Na un establecimiento di bon nomber, nan a causa un desaster bao di nan "**something**" te cu gerencia mester a cera e lugar, trata na tene nan contento y despues habri atrobe pa publico.

Tur esakinan ta cosnan cu **ARUBIANONAN** mester soporta semper cu tin actividadnan di **EXTERIOR** na Aruba.

Arubianonan no ta wordo duna ningun clase di respet y **SEMPER, SEMPER y SEMPER** pa no bisa: "**SEMPER, SEMPER, SEMPER**". Arubianonan ta wordo trapa y cu bendicion di **ARIBA, Ariba y Ariba**. Pero e cosnan aki ta pasa tambe semper ora den e organizacion tin hendenan di afo cu tin di bisa y ta manda y no esnan di Aruba.

By the way, ningun hende a menciona di e cantidad cu a cumpra henter nan paquete na Merca y cu na Aruba a resulta cu nan no tabata tin reservacion na hotel manera e paquete a encera.

Juby